0.0.1 aggappasādasuttam

- 1. cattāro'me bhikkhave aggappasādā. katame cattāro?
- 2. yāvatā bhikkhave sattā apadā vā dipadā vā catuppadā vā bahuppadā vā rūpino vā arūpino vā saññino vā asaññino vā nevasaññīnāsaññino vā, tathāgato tesam aggamakkhāyati araham sammāsambuddho. ye bhikkhave buddhe pasannā, agge te pasannā, agge kho pana pasannānam aggo vipāko hoti.
- 3. yāvatā bhikkhave dhammā saṅkhatā, ariyo aṭṭhaṅgiko maggo tesaṃ aggamakkhāyati. ye bhikkhave ariye aṭṭhaṅgike magge pasannā, agge te pasannā. agge kho pana pasannānaṃ aggo vipāko hoti.
- 4. yāvatā bhikkhave dhammā saṅkhatā vā asaṅkhatā vā, virāgo tesaṃ dhammānaṃ aggamakkhāyati. yadidaṃ madanimmadano pipāsavinayo ālayasamugghāto vaṭṭupacchedo taṇhakkhayo virāgo nirodho nibbānaṃ. ye bhikkhave dhamme pasannā, agge te pasannā. agge kho pana pasannānam aggo vipāko hoti.
- 5. yāvatā bhikkhave saṅghā vā gaṇā vā, tathāgatasāvakasaṅgho tesaṃ aggamakkhāyati. yadidaṃ cattāri purisayugāni aṭṭhapurisapuggalā esa bhagavato sāvakasaṅgho āhuneyyo pāhuṇeyyo dakkhiṇeyyo añjalikaraṇīyo anuttaraṃ puññakkhettaṃ lokassa. ye

bhikkhave saṅghe pasannā, agge te pasannā. agge kho pana pasannānaṃ aggo vipāko hoti.

- 6. ime kho bhikkhave cattāro aggappasādāti.
 - 80. aggato ve pasannānam aggam dhammam vijānatam, agge buddhe pasannānam dakkhiņeyye anuttare.
 - 81. agge dhamme pasannānam virāgūpasame sukhe, agge saṅghe pasannānam puññakkhette anuttare.
 - 82. aggasmim dānam dadatam aggam puññam pavaḍḍhati, aggam āyum ca vaṇṇo ca yaso kitti sukham balam.
 - 83. aggassa dātā medhāvī aggadhammasamāhito, devabhūto manusso vā aggappatto pamodatīti.